


TEZAUUR LITURGIC

8 AUGUST

**ACATISTUL
SF. CUVIOS
FILARET KULAKOV
DE LA
ICIALKOV**



MOSCOVA, 2000



Акафист блаженному Филарету, Ичалковския земли подвижнику

Кондак 1

Избранный угодниче Христов, скорый помощниче и молитвенниче о душах наших, оставив мир и яже в мире и Господеви благоугодив, яко звезда светлая просиял еси добродетельным своим житием и чудотворением. Ныне же, имея дерзновение, молися за ны ко Спасу Христу; мы же, ведущие тя яко заступника приснаго, ублажаем тя и согласно вопием: Радуйся, блаженне отче наш Филарете, Ичалковския земли радости и утешение.

Икос 1

Ангелоподобную чистоту от юности своея возлюбил еси, блаженне отче Филарете, и яко заря утренняя возсиял еси в подвизах поста и молитвы в пределах земли Ичалковския, благонравным своим житием разгоня всякую тьму греховную и приводя многия люди к свету Божию. И ныне мы, благодаряще Господа, давшего нам толикаго Своего угодника,

приносим ти благохваления сицевая:

Радуйся, родителей богобоязненных чадо
богодарованное.

Радуйся, благочестию и любви к Богу материю
своею наученный.

Радуйся, многия добродетели ея унаследовавый.

Радуйся, всякое благонравие от отца своего
восприявый.

Радуйся, от юности своея всем сердцем и
разумением своим Господа возлюбивый.

Радуйся, вся красная и скоропреходящая мира
сего ни во что же вменивый.

Радуйся, мужу желаний духовных.

Радуйся, примеру братьев своих много
подражавый.

Радуйся, житию их по Бозе усердно
поревновавый.

Радуйся, вся намерения своя, како благоугодити
Господеви, искренне полагавый.

Радуйся, како обрести в земном своем житии
желаний край всяко искавый.

Радуйся, Ичалковския веси украшение.

Радуйся, блаженне отче наш Филарете,
Ичалковския земли радости и утешение.

Кондак 2

Видя Господь желаня и стремления души
твоя, блаженне отче Филарете, в подобие

братии своей отрешитися от всякия мирския суеты, обаче родителие твоя презираша твоя горняя помышления и тщашася отвратити тя от служения Богу во иночестем чине, но ничтоже успеха, укрепляющу тя Богу, Емуже непрестанно взывал еси: Аллилуиа.

Икос 2

Разумел еси добре, блаженне отче Филарете, яко живя в мире, неудобь обрящещи спасение.

Торжеству же брачному приспевшу, никакоже прекословил еси воле родителей твоих, иже предложиша ти прияти брачный союз. Ты же предпочел еси в девственной чистоте Господу благоугодити, и тако, по обоюдному единомышлению с нареченною твоею, оставил еси дом отеческий, удалившись во излюбленное тебе пустынное место. О сем убо мы удивляющеся, приносим тебе хвалы сия:
Радуйся, Божий избранниче, искушеньми мира сего никакоже прельстивыйся.

Радуйся, вольную нищету Христа ради паче богатства возлюбивый.

Радуйся, чистоту души и тела твоего Христу Богу непорочно соблюдый.

Радуйся, послушание Воли Божией паче послушания родителем своим показавый.

Радуйся, и нареченную свою Анастасию на путь

пустынножительства наставивый.

Радуйся, яко и тая молитвами твоими до конца живота своего девство честно соблюла еси.

Радуйся, в храм Божий на молитву усердно приходивший.

Радуйся, к Святым Христовым Тайнам в глубоком благоговении приступавший.

Радуйся, молитву непрестанную возлюбивый.

Радуйся, к мірскому не прилепляяся в мире поживый.

Радуйся, ко Господу очи сердца твоего возводивый.

Радуйся, блаженне отче наш Филарете, Ичалковския земли радости и утешение.

Кондак 3

Силою Духа Божия водимый и укрепляемый, блаженне отче наш, удалился еси в пусто место во един из приалатырских косогоров, яко един из отшельников, взыскующих Господа, полагая zde начало отшельнической жизни своея в нищете и во всяких лишениях, возлагая упование свое на помощь от Господа Сил, молитвы вознося к Сотворшему небо и землю, и невозбранно поя Ему: Аллилуиа.

Икос 3

Имея велию ревность по Бозе и велие тщание к жизни подвижничестей, угодниче Божий, с любовью воспринимал еси вся тяготы и лишения, да не возобладает плоть над духом. О сем убо умиляющесе, глаголем тебе таковая: Радуйся, Царя Небеснаго воине добропобедный. Радуйся, от млада возраста всего себе вдавый на служение Господу.

Радуйся, наставниче дел добрых.

Радуйся, бесовских сил прогнание.

Радуйся, правило веры истинныя.

Радуйся, образе нищеты духовныя.

Радуйся, в души твоей добродетели высокия возрадивый.

Радуйся, любителю добродетели тезоименитый.

Радуйся, подвигов ради временнаго жития в покое вечнем обитающий.

Радуйся, яко упованием Ною уподобился еси.

Радуйся, Илии и Елисею подобящесе, воды алатырския яко по суху преходивый.

Радуйся, в добродетелех благоискусен подвижник бывый.

Радуйся, блаженне отче наш Филарете, Ичалковския земли радости и утешение.

Кондак 4

Бурю страстей юношеских воздержанием всяко укрощая и постом приобретая благодатное безстрастие, блаженне отче Филарете, силою Божию укрепляем на подвиги духовныя и Бога имея помогающа ти, направил еси стопы своя в Саровскую обитель и тамо сопричтен был еси к стаду словесных овец, и наречен бе не Филипп, но Филарет, во еже непреткновенно возходити по стезям добродетелей к совершенству духовному в меру возраста Христова, воспевая Богу песнь: Аллилуиа.

Икос 4

Слышаша мнози о богоугоднем житии твоём, богомудре отче наш Филарете, и прихождаху к тебе: овии послушати словеса твоя, овии исцеления от недугов своих прияти, ты же, вся отечески приемля, руководил еси ко спасению, отгоняя и исцеляя всяк недуг и всяку немощь.

Мы же, благоговейно внимая всем твоим глаголам, восписуем тебе благохваления сицевая:

Радуйся, девственниче душею и телом.

Радуйся, трудолюбче нелицемерный.

Радуйся, презревший славу и человеческую суету.

Радуйся, сокрушивый сети тщеславия и гордыни.

Радуйся, с пострижением власов главы твоея все
плотское мудрование совершенно отложивый.
Радуйся, в ризу смирения одеянный.
Радуйся, в сандалии послушания обувенный.
Радуйся, куколь незлобия на ся возложивый.
Радуйся, меч духовный в руце твоей выну
имевый.
Радуйся, монашескаго жития правило
известнейшее.
Радуйся, Царствия Горняго ревностный
искателю.
Радуйся, лестнице духовнаго восхождения.
Радуйся, блаженне отче наш Филарете,
Ичалковския земли радости и утешение.

Кондак 5

Боготечной звездой явился еси ичалковстем
людем, дивный угодниче Божий старче
Филарете, егда оставив дом и вся блага его,
избрал еси себе сокровенное удолие земное еже
жительствовати, идеже и сооруди себе малую
келлию, идеже в тишине потщался еси
совершати своя подвиги и пети Богу: Аллилуиа.

Икос 5

Боголюбивии людие зряху дивное твое, отче наш
Филарете, уединенное житие, и видеv многия
твоя труды и многия твоя моления, умиляхуся, и

жаждуще святых молитв твоих, начаша
прихождати к тебе и никтоже отыде от тебе
тощь и неутешен. Сего ради и взываем тебе
сице:

Радуйся, велие мужество в житии своем
проявивый.

Радуйся, трудолюбие свое во славу Божию
неленостное показавый.

Радуйся, молитвенниче наш пред Богом
неусыпный.

Радуйся, подвиги своими горяй и светяй.

Радуйся, светильниче пустынный, осветивый
Ичалковстии пределы.

Радуйся, яко многих приходящих к тебе в разум
истины приводил еси.

Радуйся, яко лжемудрием обьуродивших
изобличал еси.

Радуйся, яко многих мысли неправые провидев,
тех исправлял еси.

Радуйся, яко приносимья тебе некими человеки
дары не принимал еси.

Радуйся, яко предваряя исходил еси из келлии в
сретение неких рабов Божих, о пришествии их
свыше извещенный.

Радуйся, укоризны не малые претерпевый и
раны и болезни от татей и разбойников, яже
нападоша на тя в келлии, приявый.

Радуйся, ради Христа простивый тем обидчиком

вся обиды и злоключения твоя.
Радуйся, блаженне отче наш Филарете,
Ичалковския земли радости и утешение.

Кондак 6

Проповедует ныне пустынька приалатырская
подвиги и отшельническое житие твое,
блаженне отче наш Филарете, зрим бо, како на
всяк день благочестивии людие притекают к
месту земнаго обитания твоего, почитающе тя и
в радости вопиюще Богу богокрасную песнь:
Аллилуиа.

Икос 6

Возсиял еси в Ичалковстей веси светом
добродетельнаго твоего жития и был еси
свотильник многим, преподобне отче наш,
указующий путь к Свету Божию, к познанию
Вечныя Истины, и тако суцу ти во Свете
присносущнем, благоговейно взываем ти:
Радуйся, отче святыи, светом добродетелей
твоих нас озаривый.

Радуйся, молитвенниче о чтущих святую память
твою.

Радуйся, душам немощным живоносный
источниче исцелений.

Радуйся, пустынниче, мирскую честь и
богатство возненавидевый.

Радуйся, светлостью жития твоего сиявый миру.
Радуйся, поучении твоими назидавый многия во спасение.

Радуйся, огонь любви Христовой в себе носивый.
Радуйся, не приложивый сердца своего к земным наслаждением.

Радуйся, покоя вечного достигнувый.

Радуйся, Православия светлый светильниче.

Радуйся, за православных люди моления возносивый.

Радуйся, твоими подвиги от обленения нас возставляяй.

Радуйся, блаженне отче наш Филарете,
Ичалковския земли радости и утешение.

Кондак 7

Едино хотение имея, человеке Божий, и едино желание, едино просих от Господа и то взыскал еси, еже жити ти в Дому Господни во вся дни живота своего. Пренебрегл еси отчее наследие и, возненавидев любовь плотскую, отреклся еси себе самаго, на многия лишения вдавши себе, прося у Господа, да не лишит тя Царствия Своего Небеснаго, идеже вечно воспеваеши Триединому Богу: Аллилуиа.

Икос 7

Чудо превелие показася нам в житии твоём,
отче, дивный наш старче, хотя бо волю
родителей твоих исполнити, ко брачному венцу
пришел еси, обаче благодати Божией свету в
сердце твоём возсиявшу, изведен был еси на
пути иныя, Алексию человеку Божию в подобие.
И тако восприял еси в души своей боговедения
дар совершен во спасение всех нас, поющих
сицевая:

Радуйся, чистотою девства своего превосшедый
человеческое свое естество.

Радуйся, добровольным своим подвигом ангелы
удививый.

Радуйся, и в брэннем телеси твоём, якоже и в
души твоей Бога прославивый.

Радуйся, образе благочестия бывый всем
приходящим к тебе.

Радуйся, во плоти поживший духовне, на земли
небесно.

Радуйся, восходяй к Богу от силы в силу.

Радуйся, всякую добродетель делами своими
изображавый.

Радуйся, Храма Божия неленостный посетителю.

Радуйся, на молитву церковную прежде всех
приходивый.

Радуйся, путем дивным и неудобопостигаемым
храма Божия в велие разлитие речное

достизавый.

Радуйся, в храме Божиим присно на молитве с велиим благоговением и страхом Божиим предстоявый.

Радуйся, любовью ко храму Божию горевый и попечение многое выну о нем имевый.

Радуйся, блаженне отче наш Филарете, Ичалковския земли радости и утешение.

Кондак 8

Странен сый, яко пришлец во Ичалковстей веси, блаженне старче, был еси, преселившись во знаемей ныне висоцей горе, взыскуя Господа, и сединами старости украшен, духовной мудростию укреплен, многим совета ищущим был еси наставник, указуя всякому вопрошающему тя путь ко спасению, и пети наставляя немолчно Богу: Аллилуиа.

Икос 8

Все житие твое, достоблаженне старче, богоугодно бысть и деяния вся твоя быша во славу Божию. Егда же постиже тя болезнь некая, неустанно Господа благодарил еси, Творца своего за вся прославляя. Егда же предлагаша ти вдатися ко врачуем и тем сотворити болезни твоя облегчение, исполнен сый всякия благодати, отвергл еси сие,

отвещава гомце: «Сия ест крини райския, Господем насажденныя, и не лепо ми ест уничтожати я». Мы же, дивящеся глумоцей вере твоей, еже к Богу, глаголем тебе таковая: Радуйся, делы любве твоея веру твою чудотворящу показавый.

Радуйся, болезнями своими здравие души стяжавый.

Радуйся, болящия здрави возставивый.

Радуйся, тайная согрешения человеческая обличавый.

Радуйся, любовь велию к Богу показавый.

Радуйся, житием отцев пустынных плененный.

Радуйся, в подвизех своих неумоимый.

Радуйся, во благочестии неохладимый.

Радуйся, благодатию Божией обогащенный.

Радуйся, благими помыслы и делы своими многоплодный.

Радуйся, путь истины к жизни вечней обретый.

Радуйся, очистительнаго покаяния токи слез источивый.

Радуйся, блаженне отче наш Филарете, Ичалковския земли радости и утешение.

Кондак 9

Всякое естество ангельское удивися высоте добродетельнаго твоего пустыннаго жития, досточудне отче наш Филарете, сего ради

Церковь Божия благоукрашается, почитая святое твое преставление, прославляя тя яко причастника Божественных благодати, темже велегласно зовем вси Дивному во святых Своих Богу: Аллилуиа.

Икос 9

Витийства риторския не могут изрещи, блаженне отче, подвиги и вся борения твоя, подъятые в пустынном твоём житии, но мы любовь твою побеждаем, возглашаем тебе хваления сицевая:

Радуйся, милосердия Христова подражателю.

Радуйся, Христа всем сердцем возлюбивый.

Радуйся, богоугодным житием твоим веру утвердивый.

Радуйся, блаженство райское со святыми унаследивый.

Радуйся, слезами сеявый, ныне же радостию пожинай.

Радуйся, праведно и богоугодно течение земное совершивый.

Радуйся, <яко> благ неизреченных наслаждаешься.

Радуйся, жителю Божественнаго селения.

Радуйся, всемогущий наш заступниче.

Радуйся, венец нетления от руки Христовы получивый.

Радуйся, прибежище наше во всех напастех.
Радуйся, на невидимыя враги наша сильный поборниче.

Радуйся, блаженне отче наш Филарете,
Ичалковския земли радости и утешение.

Кондак 10

Спасения ищуще, блаженне старче, в приалатырском косогоре вселился еси, и деяньми благими украшен, в мире премирно пожил еси, Господу непрестанно вопия богокрасную песнь: Аллилуиа.

Икос 10

Стена еси ты и покров всем прибегающим к твоему заступлению, отче наш преблагий Филарете, темже мы, верующие в твое о нас молитвенное предстательство, молимся и просим тя, буди нам стена и ограждение неоторимое от всяких зол и напастей, да зовем тебе сице:

Радуйся, преславный наш заступниче.

Радуйся, благих в добре утверждающий.

Радуйся, боголепное украшение Христовой Церкви.

Радуйся, земнаго твоего отечества небесный покровителю.

Радуйся, явлением мощей твоих в Православии нас утверждающий.

Радуйся, пред гробом твоим нас предстоящих
умиления исполняющий.

Радуйся, и по смерти аки живой многим
являйся.

Радуйся, яко к желанию спасения нас поучаеши.

Радуйся, богатым мира сего доброе вразумление.

Радуйся, учителю наш кроткий и милостивый.

Радуйся, яко упованию на милость Божию нас
научаеши.

Радуйся, чудотворче наш новый и великий.

Радуйся, блаженне отче наш Филарете,

Ичалковския земли радости и утешение.

Кондак 11

Песни надгробныя со славою тебе принесе
духовный твой отец Флавий и мнози
священницы и диаконы. Множество же великое
людей Божиих, ведущих твое доброе богоугодное
житие и твое к ним благосердие, провождаху
гроб твой к месту погребения твоего ко храму
Божию, о коем попечение велие имел еси и
идеже непрестанно воспеваеся
умилостивительная песнь Господеви: Аллилуиа.

Икос 11

Светильника добродетелей, Ичалковстей веси
явленнаго, ведяше тебе, отче наш
блаженнейший, боголюбивии людие, на твое

светлое погребение во множестве стекшиися, проводити хотяще тебе в путь всея земли, и плакаху и рыдаху о твоём разлучении. Дуси же нечистии, не могущие терпети величия пустынных твоих подвигов, усты одержимых ими издаваху вопли своя. Мы же, зряще вся сия, из глубины души взываем ти:

Радуйся, Божий избранниче.

Радуйся, ангелом собеседниче.

Радуйся, и от нас любовь твою не отступивый.

Радуйся, и нам от дарованных ти низпосылай.

Радуйся, Всесветлаго Царствия Христова наследниче.

Радуйся, по трудех временный жизни покой вечный получивый.

Радуйся, с преподобными ублажаемый.

Радуйся, не токмо духом нам спребываяй, но и мощи твоя, яко утешение некое, нам явивый.

Радуйся, яко молящимся у мощей твоих исцеления всяких скорбей и болезней подаются.

Радуйся, яко благодать Божия, чрез мощи твоя действующая, коемуждо в печалех подает утешение.

Радуйся, <яко> всякое прошение всех прибегающих к тебе исполняется.

Радуйся, яко предстательством твоим безконечныя жизни сподобляемся.

Радуйся, блаженне отче наш Филарете,
Ичалковския земли радости и утешение.

Кондак 12

Благодатию Божиею уведевше время от жития
сего отшествия, испросил еси у отца своего
духовнаго благословения напутствовати тя
Святых Христовых Таин, и тако приуготовив
себя ко исходу во ин мир до конца земнаго
жития своего, из глубины сердечныя взывал еси
ко Владыце живота: Аллилуиа.

Икос 12

Воспеваем подвиги и труды твоего
равноангельного жития, имиже Христос Господь
прослави тя в земли Ичалковстей, темже и нас
грешных сотвори причастники Божественныя
тоя благодати, да в радости сердца зовем ти:
Радуйся, пустынночестивых подвигов ревнителю.
Радуйся, нищеты духовныя образе благий.
Радуйся, Царствия Божия наследниче.
Радуйся, благий рабе и верный, вшедый в
радость Господа своего.
Радуйся, сердца всех любовью твоею к себе
привлекай.
Радуйся, во искушениях нам присный
помощниче.
Радуйся, скорбных утешителю.

Радуйся, вражиих наветов отразителю.

Радуйся, от жития сего отходящим заступление
твое приносящий.

Радуйся, радости духовныя боголюбивым душам
подателю.

Радуйся, у престола Божия теплый о нас
предстателю.

Радуйся, всякую добродетель делы своими
изобразивый.

Радуйся, блаженне отче наш Филарете,
Ичалковския земли радости и утешение.

Кондак 13

О преблаженне старче, отче наш Филарете,
скорый наш помощниче и молитвенниче о
душах наших, возри ныне благосердием своим
на ны грешныя, просящия у тебе помощи и
заступления. Буди спасения нашего ходатаю
теплый, да сподобимся с тобою и всеми святыми
воспевати Богу во веки: Аллилуиа, Аллилуиа,
Аллилуиа.

Сей кондак глаголется трижды. И таже: Икос 1 и
Кондак 1.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**